

حوار مع عيلة عجة



مُقَلَّمَةٌ




الحمد لله رب العالمين والصلاة والسلام علي النبي الكريم-صلي الله عليه وسلم-وعلي آله
صحابه أجمعين..

أما بعد..

هذه الرسالة لسلسلة الشيخ أحمد الأهواني الشيقة والقيمة في بيان صحيح الزواج الشرعي
وبيان الصعوبات والعادات المخالفة للشرع في سياق شيق وسلس للحاج عجة وعائلته
كنموذج واقعي موجود في المجتمع المصري.

وكتبها الشيخ في خمس حلقات وجمعتها الموسوعة ووجدت الغلافة طيبة من طرف الشيخ
فقامت بالجمع والتنسيق وإضافة بعض الجملات للملف ليكون في صورة تليق به.

ونسأل الله القبول والإخلاص أنه ولي ذلك والقادر عليه



مع تحيات

موسوعة اعرف دينك للعلوم الشرعية



#حوار مع الحاج عجة 🗣️

👉 كان لازم نفهم أبعاد الشخصية دي...ليه هو عجة؟..وبقى عجة إزاي؟..وايه معنى عجة؟ 🤔
(تعالوا معنا 👉)

-بصراحة يا حاج عجة أنا من زمان نفسي أتكلم معاك في شوية موضوعات كدا ومش عارف
أبدأ معاك منين

=أبدأ زي ما تحب يا شيخ تحت أمرك

-في مشكلة بنتك الأخيرة اللي كنا داخلين فيها علشان نصلح كنت أنا والمشايخ اللي معايا
متعجبين منك جامد ، ناخذ منك كلمة وتاني يوم ترجع فيها ، تدينا قرار وتاني يوم ترجع فيه...هو
إيه الموضوع يا حاج؟

=بص يا شيخ..أنا زمان كانت خبرتي ضعيفة وكنت متمزمت جدًا في قراراتي وفاهم إن دي هي
الرجولة والنخوة ، وبسبب كده حياتي كانت هتبوظ

-كانت هتبوظ إزاي يا حاج؟

=يعني مثلاً كنت فاهم القوامة دي مثلاً هي الإنفراد بالرأي ، وإن البيت يكون ماشي برأي واحد
لحد ما قعدت مع الشيخ بحباني إمام المسجد وقعد يفهمني الدين صح وإن الدعوة والتدين
ملوش علاقة بالتشدد

-طب والشيخ بحباني فهمك القوامة إزاي غير اللي إحنا نعرفها؟

=في بداية جوازي اختلفت أنا والحاجة (سَيِّطَرَة) في موضوع زياراتها لأمها ، ولما سيطرة سابت
البيت ومشيت قعدت متضايق ومهموم ، الشيخ بحباني لاحظ عليا كدا في المسجد فسألني
فقلتله السبب فقاللي: (يا حاج عجة إنت هتكون أحسن وأفضل من سيدنا النبي ﷺ في تعامله
مع أزواجه؟)

قلتله: (لأ طبعًا ، دا إحنا بنتعلم من سيدنا النبي ﷺ)

طبعًا يا شيخ إنت عارفني بحب سيدنا النبي ﷺ أد إيه

-طبعًا طبعًا يا حاج..دا إنت بتقعد في الدكة اللي ورا في المسجد كل جمعة تعيط كل ما تيجي
سيرته

=الله ينور عليك..أديك واخذ بالك أهوه..الشيخ بحباني بقى قاللي إن النبي ﷺ كان بيستشير أزواجه في كل شئ ، فيه حد هيكون أكثر رجولة من النبي ﷺ ؟

-لا طبعًا...بس معلى يا حاج..هو النبي ﷺ كان بيستشير أزواجه إزاي؟

=حكالي قصة مشاورة النبي ﷺ (لأم سلمة) في قصة الحديبية ..عارف القصة ياشيخ؟

-طبعًا..القصة بتقول إن النبي ﷺ لما صَالَحَ قريشًا على الرجوع ، وعدم دخول مكة عامهم هذا ، قال لأصحابه : (قُومُوا فَأَنْحَرُوا) ، قال الراوي : " فَوَاللَّهِ مَا قَامَ مِنْهُمْ رَجُلٌ حَتَّى قَالَ ذَلِكَ ثَلَاثَ مَرَّاتٍ [كل ده والصحابة مسمعوش الكلام من الغم اللي أصابهم] ، فَلَمَّا لَمْ يَقُمْ مِنْهُمْ أَحَدٌ دَخَلَ عَلَى أُمِّ سَلَمَةَ ، فَذَكَرَ لَهَا مَا لَقِيَ مِنَ النَّاسِ ، فَقَالَتْ أُمُّ سَلَمَةَ: يَا نَبِيَّ اللَّهِ ، أَتُحِبُّ ذَلِكَ ، أَخْرَجَ ثُمَّ لَا تُكَلِّمُ أَحَدًا مِنْهُمْ كَلِمَةً ، حَتَّى تَنْحَرَ بُدْنَكَ ، وَتَدْعُو حَالِقَكَ فَيُحْلِقَكَ . فلما فعل ذلك ، قاموا فنحروا"

=شايف بقى ياشيخ?...أديك عارف القصة أهوه

-أبوا يا حاج...بس إيه علاقة القصة بموضوعنا؟

=ما هو النبي ﷺ استشار أم سلمة أهوه وأخذ بمشورتها

-يا حاج الله يهديك إنت والشيخ بحباني بتاعك..فين إستشارة النبي ﷺ لأزواجه في كل شئ؟

دا مفيش ولا رواية استشار فيها زوجاته غير رواية أم سلمة علشان دي أم سلمة يا حاج

=يعني إيه علشان دي أم سلمة؟

-يعني أصلًا أم سلمة دي كانت صاحبة رأي ، فقيهة ، حكيمة يعني مش أي حد ، دا الحافظ ابن حجر رحمه الله علق على الرواية دي وقال : " فيه جواز مشاورة المرأة الفاضلة "...واخذ بالك من الفاضلة دي؟

وكمال ابن بطل في شرحه لصحيح البخارى قال في الرواية دي : " وفيه : جواز مشاورة النساء ذوات الفضل والرأي "...يعني الموضوع متوقف على قدر معين من الرأي والحكمة

المهم كمان إنك تفهم إن الموضوع برضو هيرجعك في إتخاذ القرار

=يعني إيه هيرجعلي؟ 😊

-يعني لو كانت امرأتك ذات رأي وعلم وحكمة وشاورتها في شئ لازم تفهم إن القرار النهائي بتاعك

شايف الإمام الخطابي في " معالم السنن " بيقول إيه : " وفي قبول رسول الله ﷺ إشارة أم سلمة عليه بأن يبدأ بنحر هديه ، وحلق رأسه : دليل على جواز مشاورة النساء ، وقبول قولهن إذا كن مصيبات فيما يشرن به"

يعني تقدير أمر إصابتها دا يرجع لك إنت وإنت صاحب القرار النهائي فيه

=أيوا ياشيخ مقلناش حاجة.. بس لما بنختلف خالص أنا دماغي كبيرة بكبرها علشان الدنيا
تمشي

-مينفعش يا حاج...ساعة الخلاف لازم الست تفهم إن مَرَد الأمر لك ، والقرار النهائي بتاعك
إنت

النبي ﷺ يقول (الرجل سيّد أهله ، و المرأة سيّدة بيتها)
يعني المرأة بيكون لها سيادة ومكانة في بيتها ولكن إنت اللي فوق..إنت سيّد أهلك كلهم في
القوامة والرياسة

=ياشيخ بس الشيخ بحباني مفهمني إن القوامة مشاركة وحب ومراعاة مشاعر المرأة
-يا حاج عجة.. مراعاة المشاعر ملوش علاقة بالقرارات نهائياً ، ثم إيه موضوع القوامة مشاركة
دي؟..إنت أصلاً لو مش قادر تقوم بالقوامة لوحدك مكنتش اتزوجت من الأول يا حاج 😊

=مش المقصد ياشيخ..إنت بس مش فاهمني
-يا حاج أنا فاهمك كويس جداً وعارف كل اللي بيقوله الشيخ بحباني ولكن انتوا اللي مش
فاهمين معاني القوامة إيه؟

=وايه هي معانيها؟
-شوف مثلاً الإمام ابن كثير وهو بيشرح معناها في آية: (الرَّجَالُ قَوَّامُونَ عَلَى النِّسَاءِ) قال إيه
قال رحمه الله: (الرَّجُلُ قَيِّمٌ عَلَى الْمَرْأَةِ، أَيُّ هُوَ رَئِيسُهَا وَكَبِيرُهَا وَالْحَاكِمُ عَلَيْهَا وَمُؤَدِّبُهَا إِذَا
اعوجّت)

شايف المعاني دي؟
=طيب ياشيخ ما أنا بدأت حياتي كدا اكتشفت إن (سيطرة) عملت معايا مشاكل كتير ومقبلتش
الوضع ده

-يا حاج عجة كان لازم من الأول تفرض قوامتك على بيتك مش تسلم الراية بالشكل المهين
ده... شايف الوضع معاك وصل لإيه؟
=امممم... وصل لإيه؟

-يا حاج إحنا بقالنا سنتين بنقنع بنتك (تَمَرْد) ترجع بيتها وهي تقول لنا اللي ماما تقول عليه
هعله

وابنك (شُوربة) كل ما نطالبه يهدي أخته يقول (ماما لسه مأخذتش قرار)
إنت فين يا حاج؟...وليه عيالك مبقوش شايفينك خالص كدا..مينفعش القرارات الخاصة بيك
وبعيالك يكون الحُكم فيها للزوجة ، دا الزوجة نفسها واجب عليها تمشي بقرارك وتخضع لأوامرك
إنت شايف إن الحاجة سيطرة بتتكلم مضبوط وللا هتخرب بيت البنت؟

=والله يا شيخ أنا مش عاجبي الوضع نهائي.. بس أعمل إيه...؟ ما باليد حيلة 🧐

-يعني إيه يا حاج؟..نرد على زوج بنتك نقول له إيه؟

=بإذن الله هرد عليك بكرة لما أشوف سيطرة قررت تعمل إيه الأول 🎮

{ياريتنا كنا اتكلما مع سيطرة من البداية} 🌟

#عيلة عجة (1)



#حوار مع سيطرة 🎮

وصلنا في مشكلة (تمرد) بنت الحاج (عجة) لصاحبة القرار الرئيسي وهي الحاجة (سيطرة) زوجة الحاج عجة

قلنا نختصر الطريق لأن عجة غالبًا مش لاقيين له كلمة ، وبعد ما وصلنا عرضنا عليها الموضوع 📌

-الحقيقة يا حاجة سيطرة إحنا جايين وعشمننا فيكي كبير ترجعي تمرد لزوجها (متغفل) علشان فيه بينهم عيال

إيه ذنب (تَشْرُد وتايهه) يتربوا بعيد عن حضن أبوهم ، إحنا عاوزين نصلح يا حاجة سيطرة =إحنا أول ناس عرضنا الصلح يا شيخ بس متغفل مش عاوز يجيبها لبر ، الواد فاكّر إنه هيتحكم في البنت وهيمشيها زي ما هو عاوز ، وفي الآخر يقوللي متريبتش على كدا.. (قال مترياش على كدا قال..طب إنت ملقيتش بيت فيه سيطرة تتربى فيه إيه مشكلتي أنا وبنتي مش فاهمه) -ياحاجة دا الواد من أول يوم مش عارف يتعامل مع بنتك ، من أول يوم زواج مبتسمعش كلامه.. كل حاجة تهدده وتقول له: (هروح لماما.. وتقعد تشتكي ليكي وتحكيلك حياتهم.. كدا ميصحش يا حاجة)

=ياشيخ عيب عليك إنت اللي تقول الكلام ده ، دا بدل ما تعقله؟

اللي ملوش كبير بيشتريله كبير ، وتمرد بنتي متربيه أحسن تربيته وطالعه من بيت له كبير مش جايه من الشارع

-ما هو إحنا يا حاجة رجعنا لكبير البيت قال لنا إن كل حاجة في إيديكي...نعمل إيه؟

=شوف زي ما بقولك إزاي؟..قال لكم كل حاجة في إيدي أهوه...البيت له كبير ياشيخ

-تقصدي يعني انتي كبيرة البيت؟

=والله ما كنت عاوزه من البداية ، بس كنت زي أي ست عاوزه تتركب _ قصدي عاوزه تاخذ زمام القيادة _ والحاج عجة ربنا يديله الصحة كان عنده إستعداد لكده

أرفض بقى ياشيخ وأسبب بيتنا يخرب وسفينة الحياة تغرق؟

-هي كدا بتغرق فعلاً يا حاجة ، دا متغفل بيأكدلي إنه مشفش وشك في الخطوبة وكل ما كنت ألومه علشان كمل في الجوازة يأكدلي ده

=مشفش وشي ؟..مشفش وشي إزاي يعني ياشيخ؟

هو ناسي إن عجة قال له: (إحنا بنشتري راجل) وأول ما بدأ الإتفاق معاه اتفاجئ بالكلام يتغير؟
-أيوا فعلاً..دي كان يوم الإتفاق فعلاً

=مسألش نفسه عن سبب التغيير؟..فيه رجالة بيرجعوا في كلامهم؟

-تقصدي يعني إن انتي السبب؟

=لمصلحة بنتي ياشيخ مش لمصلحتي خالص..دي ولية وكان لازم نأمنها

-طيب يعني بس الحاج هو اللي كان في الإتفاق وقاعد مع الرجالة

=هو يعني كان يعرف يقول كلمة من غير ما يستأذن منهم علشان يدخل الحمام؟...ما هو الحمام عندي جوا ياشيخ وأنا كنت واقفة ورا الستارة بتابع كل حاجة ، هو فيه واحدة أصيلة تسبب جوزها لوحده في إتفاق زي ده ؟...دا أنا كنت مقعداله الواد (شُوربة) علشان يحذره والواد (جوافة) كل ما يطلعُ لهم حاجة بيلغني إن عم العريس قاعد يفاصل

ثم يعني هو جاي يعمل راجل على بنتي دلوقتي؟...طب وافق على القايمه ليه من الأول؟🌈

-ياحاجة سيطرة الله يهديكي بيت بنتك دلوقتي بيتخرب ، البيت بيتهد حرفياً ومفيش داعي نقلب في القديم

=البيت هيتهد فعلاً لو مكنش له قائد ياشيخ.. أنا مش ممكن أرتاح غير لما تمرّد تعيش عيشة كريمة ومحترمة زي (حيزبونة) بنت خالتها (حرباية)

-خالتها حرباية؟..هو فعلاً متغفل قاللي عالإسم ده.. ودي مين يا حاجة؟

=دي أختي...بفضل الله قدرت تورث قدراتها لبنتها حيزبونة اللي متزوجة جديد ، ودي بنت خالتها وأنا مش هلاقي لتمرّد حد تسمعه زي الخالة وبنتها ياشيخ ، إنت فاكربي كارهه متغفل

وللا حاجة لا سمح الله ياشيخ؟

أنا عاوزه مصلحته وعاوزه راحته ، كفاية عليه الشغل والتعب اللي الرجالة ببشوفوه برا البيت
دا عجة الله يعينه علينا ببيجي مهدود حيله من الشغل ويدخل ينام كل يوم زي الفسيخة (آه والله

ياشيخ)😄

-طب وإيه علاقة دي بالقرارات يا حاجة؟

=ياشيخ القرارات دي للرجالة ، لما الراجل يكون راجل ومالي مركزه نبقى نتكلم ..دا إحنا بقينا
في زمن العجايب صحيح ..متخلينيش أتكلم بقى 😊

-طب ليه يا حاجة بتربطي بنتك بنموذج أختك حراية وبنتها حيزبونة بالرغم من وجود نموذج
أختك (هاديه) وبنتها (سماح)

=أختي هاديه ؟..منها لله هي وبنتها والله ، دول مقصرين رقبتنا ، وقال إيه بقى بتعلم بنتها
تقول حاضر ونعم في كل حاجة لزوجها وكل ما نكلمها تقول لنا طاعة الزوج وطاعة الزفت...تبقى
تخلي الزوج ينفعها لما يجي على بنتها في يوم من الأيام
أصلاً زوجها (حازم) غير عجة خالص...ديكتاتور ياشيخ..ديكتاتووووور ربنا يكفيننا شر
الصنف ده


-يعني تمرد مش هترجع بيتها يا حاجة؟

=تمرد ترجع بيتها ؟..ترجعه لما تحس إنه بيتها ياشيخ ولها كلمة.. أنا مش هسيب بنتي غير
لما يكون لها كيان في بيتها ، نموذج أختي هاديه وبناتها مش هيتكرر في بيتنا أبداً ياشيخ...
أبداً!!!!

👉اكتشفت إن الحل الأمثل إنني أقابل (شُورية) يمكن يكون له رأي ثاني...وربنا يصلح الأحوال



#عيلة عجة(2)





#حوار مع شورية 😊

تقريبًا ملقينا ش حل مع الحاجة سيطرة زوجة الحاج عجة فقررنا نحاول ندخل البيت عن طريق ابنها (شورية) وهو دا كان حوارنا معاه 🙋

-رحنا لوالدك ياشورية وبعدين رحنا لأمك ، كل دا ومفيش نتيجة ، متغفل زوج أختك عاوز عياله يتربوا في حضنه ، كفاية اللي أختك تمرد قاعده تقوله للعيال عن أبوهم ، البعد وحش ياشورية والرجوع بعد كدا ممكن يكون صعب فعلاً ومش هنقدر نعملهم حاجة

=طب وأنا بإيدي إيه ياشيخ ، ما هو أنا ياما نصحت متغفل يكون حنين على أختي ومفيش فايدة ، هعمله إيه يعني وهو مش عاوز يكون راجل كدا بجد ويسايس أموره

-ياشورية إنت أصلاً كنت أساس المشكلة لما رحت تاخذ أختك من عنده واتناولت عليه في بيته وشتتمته وكنت عاوز تمد إيدك عليه ، نسيت كل اللي عمله معاك في فترة دراستك لما كنت تروح تقعد معاهم؟ ثم كمان فيه حد يقول لأخته لو عاوزاني أضربهولك هفرجك عليه؟

=دي أقل حاجة ياشيخ ، إنت فاكرنى هسيب أختي كدا يقعد يفرض عليها قراراته وأوامره ، أنا عمري ما شفت كدا في بيتنا أبداً ، وموضوع القعاد ده كان أساساً في بيت أختي ! وبعدين فين قوامة الراجل وحفاظه على عياله ، نفسية (تشرّد) هتكون إزاي لما كل شويه يشوف والده بيزعق لوالدته ؟ (تايهه) هتحب الزواج إزاي لما تلاقي المعاملة دي من الأب؟

-بس ياشورية أنا سمعت إن أختك اللي بتستفزه علشان يزعق وهو يوصل أختي ليه إنها تستفزه ياشيخ ؟ ما يعمل اللي هي عوزاه وهو ساكت ويريح دماغه ، ما هو إحنا عايشين أهوه في بيوتنا عمري ما احتاجتك في مشكلة ولا حد سمعني أنا ومراتي صوت

-وهيسمك صوت ليه ياشورية وأنت عايش زي أبوك الحاج عجة يعني والمفاتيح مش معاك



=وماله أبويا؟..بيته مستقر وعياله كويسين ومحدث بيسمعلنا حس

-إزاي بس محدش بيسمعلكوا حس ؟ أمال إحنا داخلين في المشكلة ليه؟

=دي مشكلة بيت متغفل مش مشكلنا ياشيخ ، إحنا ياما نصحناه بس مفيش فايدة

-ياشورية إنت مجرب موضوع إن زوجتك تسيب بيتها وتمشي ، وعارف عملت إيه ساعتها
وحالتك النفسية كانت عامله إزاي

=وفهمت ياشيخ ، ورحت جبتها وراضيتها خالص ، هو متغفل يعني فاكّر نفسه راجل وإحنا مش
رجالة؟


-يعني الموضوع نفسي بقي مش موضوع مبادئ وأخلاق
=ياشيخ ولا نفسي ولا حاجة ، هي دي تربيتنا وإحنا طلعلنا لقينا نفسنا كدا ، الأم هي اللي لها
الكلمة في البيت والأب كلام مسموع خارج البيت (في الحاجات اللي متخصناش يعني 😊)

-يعني مفيش منك أي تأثير على تمرّد؟
=بص ياشيخ..مفاتيح البيت مع الحاجة سيطرة ، أنا كل اللي هقدر أعمله أروح معاها للمحامي
علشان القايمه والتمكين والنفقة والحضانة

-هتمشي معاها في القضايا ياشورية ؟ وهتاخذلها الشقة زي ما هي عاوزه؟
=طبعا ، أمال أسيبها تقعد عندي وأنا اللي أصرف على العيال ؟..دا وضع مراتي متقبلوش أبدًا

👉بإذن الله قررنا نكمل المفاوضات مع تمرّد 😊

#عبلة عجة(3)





#حوار مع تمرّد 🤪

بعد ما قابلنا عجة وسيطرة وشورية وبرضو مش عارفين نحل قرنا نروح لصاحبة الشأن وهي الزوجة الغضبانة (تمرّد)

-ياأخت (تمرّد) زوجك (متغفل) عاوزك وحاولنا علشان نصلح بيتكوا كثير بس مفيش فايدته =مش عاوزه أسمع اسمه خالص ، متغفل دا مش راجل ولا يفهم معني الرجولة ، فاكر نفسه اشتراني بالملايم اللي كتبهالي في القايمه وشوية الذهب اللي جاييهم ليا في الشبكة ، وبعد ما أبويا ساعده في الجهاز لقيته بيزعقلي على الأكل اللي اتأخر _ الأكل اللي هيطفحه في الطبق اللي جاييه أبويا أساسًا _ ، تخيل ياشيخ بيعاملني زي الجارية اللي اشتراها ؟..تخيل عاوز يعاملني كاني آلة حديد معندهاش مشاعر ؟ 🤪

-ليه بس ياأختي ، إيه اللي جاب كل الكلام ده ؟
=ياشيخ كل حاجة عاوز يكون فيها الأمر الناهي ، الحياة عنده مش مشاركة أبدًا ، تخيل زعلان علشان بتكلم مع أمي؟

-ما هو بيقول إنك بتكلمها ليل ونهار وسمعك انتي وهي جاييين سيرة مرات شوربة وهو مش حابب كدا ، وزعلان جدًا من أسرار بيتكوا اللي انتي قاعده تكلمي فيها قرايبك ، مال حيزبونة بنت خالتك حراية بحياتكوا ؟...ليه تتدخل في بيت عمك وعقربة وتشوهي سمعتها ؟...ما تخليكي في بيتك

=يعني أنا لما اتواصل بأمي وصحباتي اللي أكثر مني خبرة علشان ينصحوني أبقي غلطانة ياشيخ؟..دا اللي ملوش كبير بيشتريه كبير ، دا بدل ما تكلم متغفل وتخليه يكون راجل أد المسؤولية ياشيخ ويراعي مشاعري ؟

-هو إيه حوار المشاعر اللي بتكلمي عنه كثير ده ياتمرّد؟
=متغفل ميفهمش أي حاجة في المشاعر ياشيخ ، دا عاوزني لا مؤاخذه في أي وقت (طبعًا ياشيخ مش عاوزه أوضح) 🤪

-طب وإيه المشكلة ياتمرّد ؟...هيروح لمين طيب ؟

=ياشيخ دا أنا في مرة كنت تعبانة من شغل البيت والعيال وجاي مستنيني وزعل إني مجهزتش له ، لا ويقوللي النبي ﷺ بيقول: (إذا رأى أحدكم امرأة فأعجبته ، فليأت أهله ، فإن الذي معها مثل الذي معها)

طب وانت تمشي تبصص عالنسوان ليه؟

يعني أنا لو شفت رجالة في الشوارع أروح أطلبه..مبعلش ده ولا ليا رغبة في القرف دا أصلاً - هو بيتكلم في شئ طبيعي ياتمرد بس أنا بصراحة كنت مُحرج أكلّمك فيه...انتني بتتحملني إزاي

تبعدي عن زوجك بالـ ٣ شهور ؟...دا بيقوللي إنك مفيش خالص 😊

=ياشيخ هو فيه حد فاضي ؟..ثم يعني هو مفيش في الحياة غير الموضوع ده؟

-علشان كدا بقى الهجر مبقاش جايب معاك؟

=هجر إيه ياشيخ اللي الموكوس دا بيعمله معايا.. أنا أمي كانت ممكن تبعد عن أبويا بالسنة والسنتين عادي ، إحنا مش عايشين زي زمان الست جاريه هتجري ورا الرجل ، دلوقتي فيه ختان فرعوني وتطعيمات مضروبة وأدوية منع حمل تضع رغبة أي حد في الموضوع ده ، حاجات بقت تخلي الست أقوى من الأول ، دا غير إننا زهقنا أساساً من أشكالهم في الشوارع والجامعات ووسائل المواصلات ، أنا مبقيتش شايفه متغفل أساساً ياشيخ ، هو يعني هيجي إيه في جمال شباب المسلسلات التركي؟

- هو أنا بصراحة متفاجئ ياتمرد بكلامك بس انتني محتاجه تعيشي تحت ظل راجل يحافظ عليكي ويصونك

=يحافظ عليا إيه بس ياشيخ ؟..أنا بفضل الله معايا شقة بالتمكين بعد ما ربنا رزقني بتشرد وتايهه وهيكون معايا نفقات أصرف منها ، متغفل هاخذ منه إيه في وجوده زيادة عن غيابه؟ -لو بالحسابات المادية بصراحة فعلاً مفيش زيادة؟

=شفت بقى ؟ إيه اللي يجبرني أقعد أضغط على نفسي ويلزمني أعمله أكل وغسيل هودوم ومواعين وكل شوية يقوللي سايبه المطبخ معفن ليه ؟..وكل ده وعاوزني أهتم بنفسي.. أنا بقيت مشتاقة للعزوبة تاني ياشيخ ، خدنا إيه من الزواج غير الهَم والبهدلة ؟ -هو الحاجة سيطرة موافقاكي عالكلام ده؟

=أمي بتعمل دا مع أبويا من سنين ، تعبت شويه بس الحمد لله أبويا استوعب وفهم الصح من الغلط وبقى كويس وعایش تحت جناح ماما ، الدور والباقي على متغفل اللي مش عاوز يفهم ، وعلى فكرة بقى الشيخ بحبجاني معايا في كل اللي بقوله ده وفهمني إن هو دا الإسلام مش زي اللي يفهمه متغفل

-كل دا الشيخ بحبجاني شرحهولك؟

=الشيخ بحباني دا أصلاً هو اللي فاهم يعني إيه نفسية الست وفاهم في التعامل ، مش عارفه لو صحباتي مكنوش بيشيروا القطوف بتاعته على جروبات المطلقات كنت فهمت الإسلام إزاي ؟ أنا كنت خلاص ياشيخ فاضلي خطوة صغيرة كدا وأبقى ملحدة

-لا بعد الشر ياأختي طبعاً ، قال ملحدة قال 🤪

طبعاً لقينا العيب مش عليها فقررنا نروح للشيخ

بحباني نعمل معاه حوار

#عيلة عجة(4)



#حوار مع الشيخ بحباني 🤪

فعلاً زهقنا من العيلة المتعنتة دي ، كل ما نكلم حد منهم في الحلال والحرام يحتج علينا بفتاوى الشيخ (بحباني) !

قلنا لازم نقعد معاه ونناقشه في الكلام اللي سمعناه

-ياشيخ بحباني إحنا بعد سلسلة حوارات مع الحاج عجة وزوجته سيطرة وشورية وتمرد لقينا إنه في إيدك حاجات كتير تعملها علشان تمرّد ترجع لزوجها متغفل والعيال يعيشوا في وسط أبوهم وأمهم ، ليه محاولتش تسعى في الخير ده ؟

=حاولت كتير والله بس يعني أعمل إيه معاهم ؟..البنّت مش عاوزه ترجع خالص وعاوزه تتطلق

-بس إنت عارف إن طلب طلاقها غير شرعي يامولانا ، دي مبتقولش أي أسباب ، والنبي ﷺ يقول: (أَيُّمَا امْرَأَةٍ سَأَلَتْ زَوْجَهَا طَلَاقًا فِي غَيْرِ مَا بَأْسٍ فَحَرَّمَ عَلَيْهَا رَائِحَةُ الْجَنَّةِ)

=لا ياشيخ أحمد ، تمرّد بتقول إن متغفل بيقد يديها قرارات وأوامر وهي مش متعودة على كده في بيت أبوها

-يامولانا ، إحنا هنخلي الدين يمشي حسب عادات الناس وللا إيه ؟

=مش فاهم 🤪

-يعني كان واجب عليك توضّح لتمرّد إن اللي بيحصل في بيت الحاج عجة ده من سيطرة الحاجة (سيطرة) على مجريات أمور حياتهم مش هو الصح ، الإسلام جعل القوامة للراجل علشان

يكون القرار النهائي له مش لزوجته ، ومش معنى إن تمرد شافت عكس ده في بيتها نشجعها على كده ونقرها عالغلط

=بس ياشيخ أحمد دا عُرف ماشي وأنا نفسي في بيتي بعمل كدا
-في بيتك بتعمل كدا! 😊

=لا مقصدهش ، أقصد يعني إن البلد كلها بقت ماشيه كدا 🏠
-ياشيخنا الفاضل ، إحنا بنرد الناس للأصل مش بنسايرهم عالغلط ، إنت وضحت للناس الشرع وهما رفضوه ؟

=ياشيخ أحمد إحنا أصلًا لو قلنا للناس الشرع زي ما ربنا أنزله مش هياخدوا بكلامنا ، وبعدين هياخدوا بكلام أي حد ، يرضيك الناس يطلعوا الشرع من حياتهم بسببنا ؟
-يعني إنت علشان لما هتعرفهم الشرع هيطلعوك تقوم عامل تحريف للشرع علشان يقبلوه ؟..وهما كدا يعني بقوا ماشيين صح؟...ربنا بيقول: (وَقُلِ الْحَقُّ مِنْ رَبِّكُمْ فَمَنْ شَاءَ فَلْيُؤْمِنْ وَمَنْ شَاءَ فَلْيُكْفِرْ)

إحنا مكلفين فقط بالدعوة مش بالنتيجة ياشيخ بحبجاني
=ما هو دا من مراعاة أقل المفاصد برضو ياشيخ أحمد
-يامولانا هي فين أقل المفاصد دي ، هو فيه مفسدة أكبر من إنك تنقل القوامة لتمرد علشان تحل الإشكال؟...دا أنا بلغني إنك بتقول لهم إن متغفل قاعد يعيط وحزين جدًا وندمان عالي عمله!.. مش قادر أصدق إنك قلت كده لهم وإنت عارف إن متغفل عاوز يعيش راجل في بيته ومش عاجبه الوضع ده

=ياشيخ لعلك لم تطلع على حديث النبي ﷺ الذي يقول فيه: (لا أعدّه كاذبًا الرجل يصلح بين الناس يقول القول ولا يريد به إلا الإصلاح)
يعني معايا رخصة في الكذب لأجل الإصلاح
-فين الإصلاح اللي بتكذب علشاناه دا ياشيخ ؟...دا مش إصلاح أبدًا.. دا تلصيم لبيت مسلم ، البيوت المسلمة لا تقوم إلا على أساس قوي متين جدًا
تخيل لو تمرد رجعت وفي دماغها دلوقتي إن زوجها ندمان وقاعد يعيط ، تفكر هتعرف غلطها ؟

=ياشيخ أحمد إحنا لو مشينا بالكلام ده كتير من البيوت هتتخرب
-وهي مش خرابانة يعني يامولانا ؟..البيوت اللي كلمة الراجل فيها ملهاش لزمة بيوت خرابانة
بالفعل 🏠

=عالموم ياشيخ أحمد أنا ناوي أخلي (تدثر) بنتي تقعد مع (تمرّد) بنت الحاج عجة وتنصحها بشوية نصايح ، وكدا كدا تدثر ما شاء الله خلصت البناء المنهجي ومعاها إجازة -مكناش عاوزين نعطل تدثر يعني ، أنا عارف إن عندها زوج وأولاد ربنا يحفظهم بشوفهم معاك في المسجد =لا مفيش عَطلة ولا حاجة ، هي كدا كدا غضبانة وسايبه بيت زوجها أصلاً وقاعده عندي لحد ما تختلع - 🤔🤔🤔

#عيلة عجة(5)

تمت والله الحمد مع تحيات

